

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

OKETOPA 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws



Siolo Tauati FT (Toaina Penisione), Moli Moli FT, Sina Moli, Merita Tauati, Susana Iosia, Tunumoso Soliola Iosia FT (Taitaifono Fono Tele) i luma o le Maota fou, EFKS Faatoia.



Susuga Limua'a Samuelu FT (malii Oketopa 2022) ma le faletua ia Daru

FAASINO UPU

1. O LE LAUGA	2
2. AUE! UA MALILIU TOA!	3
3. AUFAILAUGA SULU SAMOA 2023	3
4. GALUEGA EFKS FAATOIA	4
5. TALA O GALUEGA EKALESLIA	5
6. GALUEGA EFKS ASAGA	6
7. O LE SULU I O MATOU VAE	7
8. O LE PEROFETA MULIMULI	8
9. P'UGA SU'EGA MALUA 2022	12
10. O E UA FAI I LAGI FOLAUGA	13
11. ATA O MATAUPU TUSIA	16

O LE LAUGA

Tusi Faitau: Ieremia 1: 1 - 5

Matua: Ieremia 1:5, “*Na a'u iloa oe a o le'i faia oe e a'u i le manava; na a'u faapaiaina oe a o le'i fanau mai oe, na a'u tofia oe e fai ma perofeta i nuu.*”

Manatu Autu: **TOFIA MO MALO**
(Appointed Over Nations)

O loo faapea mai le Manatu Autu - “Tofia mo Malo” A o loo faapea mai le Manatu Aoao o le Vaiaso, “E Tatau ona Fesoota'i Malo - Ta'u le Mea Moni i le Pule.” E mafai la ona faapea se Autu - O le Tofia mo Malo, o le Tofia e Ta'u le Mea Moni i le Pule ina ia Mafai ona Fesoota'i Malo. O loo tatou tofia mo le tausiga o aiga, o nuu ma malo, e oo lava i le Ekalesia, o le valaauina lava mo le manuia o ia faasinomaga eseese o loo tatou ola. Auā o le i'u o le filifiliga a se aiga ma tofia ai se tasi na te tausiga, o lona uiga o se tasi lea ua ave atoa i ai le faatuatuaga ma le talitonuga, na te faia le mea e finagalo i ai le aiga. Se aiga o malepelepe, o lona tofiaina, ia galue e faamaopoopo. Se aiga o fevaevae'i, se nuu o fevaevae'i, se malo o fevaevae'i, ma se Ekalesia o fevaevae'i - o lē ua tofiaina, e galue e faamaopoopo ma faalelei ina ia manuia.

E tata'i faapea se manatu, i le faamoemoe o le valaauina o Ieremia, i lona tofia faapitoa e fai ma perofeta i nuu ma malo e le Atua. Ua ta'ua le taimi

na valaauina ai Ieremia, o le taimi o loo talitonuina, le tulaga manuia o le malo o Iuta i le taitaiga a le tupu o Iosia, le tupu na se'ei i le nofoalii faato'a valu ona tausaga. Lea e faamauina, “*Na ia faia le amiotonu i luma o le Alii, ua ia savali foi i le ala uma o Tavita lona tamā, e le'i alu ese ai lava o ia i le itu taumata, po o le oti tauagavale (2 Tupu 22:2).*”

Na iloga ana galuega, auā na ia soloia ma lepetia tapuaiga faapaupau ia Paala a le malo Iuta. A o le vaitau tonu lea na valaauina ai Ieremia. Ua faailoa e le Atua ia Ieremia le tulaga ese o lona tofia o ia, auā e foliga o sē ua faia faapitoa mo le faamoemoe o le perofeta atu. O le uiga o le upu Eperu (o le nathan) o faaliliuina o le ‘Tofia’ (Appointed) o lona uiga o le avatu po o le tuu atu (to give, to put or place). O lona uiga, o le tofia o Ieremia e avea ma perofeta, e faapei o se meaalofa ua tuuina atu e le Atua mo Ieremia. A o le uiga lea o le Atua ma ana tofiga, e tofia ma aumai faatasi ma ana faamanuiaga. Ua tofia Ieremia e le Atua e fai ma perofeta i nuu ma malo, ina ia perofeta atu ma faailoa i ai o mea o le a tutupu. O le finagalo o le Atua, ia faailoa ina ia salamō ai a latou agasala ma liliu ese ai. Faailoa i ai le ogaoga o le tau i le ola agasala - auā o le itu i matu e oso mai ai le leaga i luga o i latou uma o e nonofo i le nuu (Iere. 1:13 & 14).

Pe a tatou tulituliloa pea le tofia o Ieremia i le galuega faaperofeta, ona tatou iloa ai lea na taunuu lava. Auā na i'u lava ina faatafea Iuta i Papelonía. Na lepetia ona aai, soloia ona pa ma faaumatia lona malumalu ona latou te le'i salamo. E le'i lagonaina e Iuta le siufofoga o le Atua e ala i lana perofeta. E le'i mafafai, ina ua suamalie ia i latou le ola agasala o le ifo i tupua. Auā ua latou auauna ia Paala, ma oo atu ai ina latou fasiotia a latou fanau, e ositaulaga ai ia Paala. Ua soli e le nuu la latou feagaiga ma lo latou Atua, e ala i loo latou ifo atu ma auauna ia Paala le atua mate na faia e o latou lima.

Le au uso e, le Ekalesia ma le atunuu pele Samoa, ua faamanatu mai pea le Talalelei mo i tatou ma le tatou folauga faalefaatuatua i le olaga nei. O le mea ia mautinoa, o le tofia o Ieremia o se perofeta mo malo, e le o se tofia e avea ma pule, e leai. A o le uiga lena o le faamoemoe o le Atua mo lana perofeta,

e ala i lona faalagiga, “tofia oe i le aso nei e pule i nuu ma malo, ina ia e lia’iina, ma lepetia, ma faaumatia, ma soloia, ia faatuina foi ma totoina. Ia lia’iina le ola agasala o le nuu o Iuta, ia soloia ma faaumatia lona ola faalogogata, a ia totoina i ai le ola usiusita’i, totoina ai i o latou loto le ola faamaoni ma le alofa i le Atua.

O lea foi lo ta valaauina, ma lo tatou tofia e pule i nuu ma malo. E leai e le o se tulaga pule, a e o lo tatou tofiaina ina ia tatou ta’u atu le upu moni, i le au fia pule. Ua tofia i tatou mo nuu ma malo, ua tofia lava lea o i tatou ina ia tatou fauina ia lelei, malosi ma ia manuia. A o fea e amata ai? E amata atu la tatou galuega faufau i o tatou aiga, i a tatou fanau, aiga ma nuu, ma Ekalesia ma lo ta malo.

Na saili mai le Atua ia i tatou i Lona Alo pe le o Iesu Keriso. O lona soifua atoa na sasa’aina mai ina ia faaolaina ai i tatou uma. O le Atua alofa faamaoni i le tagata, ua Ia finagalo ai e totoina lona manumalo i papa aano o tatou loto, tatou te mafai ai ona lepetia ma lia’iina le ola agasala, ai o tatou lava olaga. Malaga ia le Ekalesia ma le manuia auā lou tofiaina mo malo, ma ta’u atu le Upu moni a le Atua i e malolosi. Ona o Iesu. Amene.

*Saunia: Susuga Solomona Ta Ulu,
EFKS Maasina, Fagaloa.
Matagaluega APIA SASA’E.*

AUE! UA MALILIU TOA!

O le Toeaina Penisione, susuga Limua’a Samuelu FT, na valaauina e lona Matai i le masina nei o Oketopa, a o avea o se tasi o Matafale, ma fai le galuega lagolagosua i le Aulotu EFKS Falelauniu, o le Pulega Apia Sisifo o le Matagaluega APIA.

O le susuga i le Toeaina ia Limua’a, na ulufale i Malua i le tausaga 1978, o se sui mai le Matagaluega Tutuila a o tasi le Ekalesia ma le EFKAS. Na i’u i la’ua ma le faletua ia Daru Korua Samuelu i le tausaga 1981, ma amata galulue i le EFKS Saoluafata i le tausaga 1982. Na avea ma Toeaina o le Pulega Anoama’a i le Matagaluega Apia Sasa’e i le tausaga 2018, se’ia oo ina malolo penisione i le tausaga talu ai 2021, ina ua atoa le 39 tausaga o fai ma auauna o le Upu ma le Sakarameta. O ona toe sauniga na faia i le EFKS Falenauniu, i le Aso Toonai 29 Oketopa, na ta’ita’i e le susuga Efu Efu FT o le toeaina o le Pulega Apia Sisifo. Ia faamaise le Alii i le tina ia Daru ma le fanau.

AUFAILAUGA SULU 2023

1. IANUARI AUATAMA ESERA FS
EFKS SAPAPALII
FAASALELEAGA
2. FEPUARI SUSUGAALESANA FS
EFKS VAVAU
LOTOFAGALEPAALEIPATA
3. MATI AMOSA VAETOE FS
EFKS MATAUTU, FALEALILI
FALEALILI SAFATA SIUMU
4. APERILA ELISAIA KOLIA FS
EFKS MATAUTU-UTA
APIA
5. ME UTA MUAULU FS
EFKS FASITOO-UTA
MALUA
6. IUNI NAMAIA SAGAGA FS
VAOTUPUA, FALEALUPO
ITU O TANE
7. IULAI LUAPENE NEPO FS
AFEGA
MALUA
8. AOKUSO TUITOGA LEOTA FS
EFKS FALESEELA
AANA
9. SETEMA TUIA PESETA FS
EFKS SIUMU
FALEALILI SAFATA SIUMU
10. OKETOPA SEPI GAFI FS
EFKS SOLOSOLO
VAIMAUGA
11. NOVEMA MALEIFUA TANIELU FS
FAATONU AOAOGA KERISIANO
12. TESEMA FAITOAGA TOLUA FS
FAATONU SULU SAMOA

FAAPA'IA LE MAOTA FOU, MA OSI LE FEAGAIGA, EFKS FAATOIA

E 2 faamoemoga tetele o le EFKS Faatoia sa faataunuaina i lenei masina o Oketopa. O le Aso Toonai 15 Oketopa na faapa'ia ai le Maota fou o le faifeau. O le Toeaina o le Pulega susuga Moli Faleaitu Auimatagi Moli FT na ta'ita'i le sauniga e tomua i afioga a le Atua, *"Ou te faafetai i le Atua i aso uma lava, e le aunoa ona viiga i lo'u gutu."* Na molimauna lea aso e le afioga Taitaifono Fono Tele susuga Tunumoso Soliola Iosia FT ma le faletua, o Toeaina o le Matagaluega Apia ma latou faletua, le mamalu o le Pulega i susuga Faafeagaiga/Faifeau Nofu Aiga ma latou faletua, A'oa'o Fesoasoani ma Tiakono faapea le paia maua o le EFKS Faatoialemanu. O le susuga Oata Tuatagaloa FS o loo tausia le Aulotu, na saunia le Tala o le Galuega. Ua leva ona i ai le mana'oga e fausia se maota fou, e malu ai le faafeagaiga ma lona aiga, ma sui ai le maota tuai ua 20 tausaga, ma ia suia mai lona tulaga tuai sa i ai, auā o loo tele pea le avanoa i le fanua o le Ekalesia. Peita'i sa ave le faamuamua o galuega fai, i le tapenaga o le Penisione a le Faafeagaiga, susuga Dr. Paulo Korua FS ma Uputuu.

O le tausaga 2021 na talanoa ma tasi ai le faatofalaiga i le Ekalesia, i le Konekarate o le New Era Construction e tusia le ata ma fausia le galuega. Na amata mai le tau i le \$188,000, mulimuli ane ua siitia i le \$210,000 ona o nisi fesua'iga, a e ua \$194,000 le tinoitupe ua i ai. Sa fai pea sailiga tupe masani pei o le Bingo seia ausia le \$246,000, a o fai pea lafoga ta'i \$200 a matafale. Na amata ona tuuina atu le vaega tupe \$63,231 i le konekarate ia Aperila 26, ma faasolo ai i isi masina le ta'i \$42,154, seia atoa le **\$183,154**, a o faatali le \$10,155 totoe seia mautinoa ua lelei le galuega. Ma na iloa mulimuli ane sa i ai faaletonu o le galuega, ona fautuaina lea e le loia ina ia faamuta loa le konekarate i le tau o ta'ua i luga, ma taofi le paleni e le'i totogia. Na faaleo le faafetai i asiga na tau'a'ao i ai aiga, o lupe faalele ma e na fesoasoani lagolago atu. Ia viia le Atua.

O le afioga Taitaifono Fono Tele, susuga Tunumoso Soliola Iosia FT na saunoa e tuuina atu le faamalo ma le faafetai a le Ekalesia Aoa, i le mamalu o le EFKS Faatoia ona o la latou galuega ua tino mai ai le faatuatua ma le alolofa i le Atua e ana le galuega. *"O lē faasili ia te a'u, ou te faasili foi ia te ia.."* Ona ia tau'a'ao atu lea le meaalofo \$10,000 a le Ekalesia, faatasi ma le faamanuia i le galuega, ua lē toe faa-fale-lēmalu ai le aufaigaluega i o latou maota.

Na mae'a le sauniga lotu ona 'o'oti lea o le lipine e le faletua o le toeaina, afioga Sina Moli, e tatala aloaia ai le galuega e ulufale atu le mamalu o le valaaulia, e molimauna le matagofie o le maota e api ai le faafeagaiga ma lona aiga. Ona taualuga lea o le aso i talisuga ma fa'aalolaoga e masani ai.

O le vaiaso na soso'o ai i le Aso Faraile 21 Oketopa, na osia ai loa le feagaiga a le EFKS Faatoia ma la latou faifeau, le susuga Peter Gafa Lokeni FS ma le faletua o Tauvela. O le susuga lava foi ia Moli Moli FT na ia ta'ita'i le sauniga ma osi le feagaiga, a o le Failautusi Pulega/Matagaluega, susuga Tuuau KFE Tuuau FS na saunia le Lauga. O le susuga Oata Tuatagaloa FS na molimau e tusa ma le filifiliga a le Ekalesia. O le Aso Sa, 24 Aperila 2022 na fai ai le palota a le Aulotu na fulisia i le susuga Peter Lokeni. O Oata FS, le Laulau ma le Komiti a le Ekalesia na alu le savali e momoli le valaau a le Ekalesia i le aso na sosoo ai. E le'i pine a e latou maua le tusi mai le faifeau (sa lauina i le sauniga), o tuuina mai ai lo la'ua talia lelei o le valaau, o le faafetai mo le faatofalaiga, ma folafolaga o le a la'ua faia le galuega i le faamaoni e gata ai, mo le Atua ma le Tala Lelei. Na mae'a le molimau a Oata FS, ona tali fuaitau lea o le faafeagaiga ia Lokeni, ma faafetaia o la'ua matua ma aiga, o Aulotu ma nuu i Vailima, Vailoa Palauli, Fagali'i, Magele Puaseisei ma isi.

Sa auai e molimau i le sauniga mamalu, le Laulau Komiti Au Toeaina, afioga Taitaifono Asotasi Time FT ma le Failautusi Leaso Tupa'i FT, faatasi ai ma Toeaina Penisione ia Siolo Tauati FT, Utufua Naseri FT, ma Toeaina o le Matagaluega Apia ia Auva Peseta FT ma Efu Efu FT. O i latou ia faatasi ma sui o le EFKS Faatoia, na latou faafeiloai aloaia, talia fiafia ma faamanuia le susuga faafeagaiga ma lona faletua ma la'ua galuega, i totonu o le Aulotu, le Pulega ma le Matagaluega tainane le Ekalesia Aoa, e ala i le lūlū aao, fusifusi, feasogi ma faatalofa. Na faaopoopo le Ta'ita'i i le Lauga, e saga faala'ei'au ai le faifeau faapea le Aulotu, i tiute feagai e tusa ma le feagaiga ua osia. Na taualuga le sauniga i le Talisuga Paia a le Alii na ta'ita'i e Peter Lokeni. Ona alo ane lea i tu ma aga masani i le va feagai ai ma le aganuu, lea sa folasia ai le 'Ie o le Feagaiga na saunia e le faifeau o tausia le galuega, o matua penisione, o lupe faalele tainane le paia faalupe maua i tamalii ma faleupolu o tofiga o le EFKS Faatoialemanu. Ia manuia le galuega. Ia viia le Atua.

NISI O GALUEGA TETELE A LE EKALLESIA

Ua tuana'i atu lena masina sa faataunuu ai le Fono Tele a le Ekalesia o lena tausaga. O se tasi o galuega a le Fono Tele i lona faagasologa, o le silasila lea ma faamaonia tala o galuega a komiti tetele e ono a le Ekalesia mo lena tausaga faalefono. O le Komiti o Feau Eseese, o le komiti lea e feagai ma soo se galuega fai a le Ekalesia, ma ua i ai foi lana komiti laititi faapitoa, ua ta'ua o le Komiti o Galuega, e nafa ma le vaaiga o nei galuega tetele uma, ina ia faatino ma faataunuu e tusa o le finagalo o le Fono Tele. O sui o le Komiti o Galuega i le mae'a ai o le Fono Tele 2022: Tunumoso S. Iosia FT (Taitaifono), Iosefa A. Uilelea FT (Sui Taitaifono), Palemia Tauiliili FT (Sui Komiti), Vavatau Taufao FS (Failautusi), Melepone Isara FS (Teutupe), Tu'u'au Tu'u'au FS (Sui Komiti), Panapa Too FS (Sui Komiti), Taua Latu Lome TK (Sui Komiti).

O nisi nei o galuega tetele a le Ekalesia ua mae'a ona fai, o galuega o loo faagasolo pea, ma galuega ua pasia e le Fono Tele lona faatinoga.

(1) Fale mo le Atina'e i Tufulele & Solomona fou: Na amata le galuega o le maota i Tufulele i le masina o Iuni 2021 ma faauma ai i le masina o Aokuso o lena lava tausaga. O lena maota sa faamoemoe e nonofo ai le aufaigaluega o le Atina'e a le Ekalesia i Tufulele, faapea nisi o faamoemoe o le Ekalesia Aoa. O loo faia foi le galuega mo fale o le Atina'e i Solomona fou, mo le aufaigaluega o le Atina'e a le Ekalesia o galulue ai i lena itu.

(2) Kolisi o Nuuausala: Na amata le galuega i le masina o Tesema 2021 i le tupe \$80,000 (o le tapulaa lea o le malosi faa-komiti mo tupe fa'aaoga). O potu a'oga ma le vaega o fale le ta'ua ua mae'a. O le a fa'aaau le galuega, ina ua pasia e le Fono Tele 2022 le \$300,000, mo le faalelea o potu mo le Pule ma Faia'oga, potu tusi, potu komepiuta, potu tele (hall) ma fale o faiaoga. O le konekarate a le afioga Tauiliili o loo faia le galuega.

(3) Fale Senetenari: O se tofa na a'e ma le talosaga mai le Komiti a Tamā o le Ekalesia ina ia faalelea atoa lea maota tāua o le Ekalesia i Malua, na faama'ite i lena galuega tele lea na silasila i ai le Komiti o Galuega. Ua toe faafou uma le 'AFA o loo faufau ai le maota, e tamalii ma

failauga o Saanapu. Ua faafou atoa le faataamilosaga i ona autafa, vaganā pou e le'i suia, ma ua malu atoa foi ma luga. Ua fou atoa le maa o loo folasia ai le maota na fausia i le 1944, e pine ai le 100 tausaga o Malua, le aai ma le laumua na faavae 24/9/1844. Ua 78 tausaga talu ona fausia le ulua'i Senetenari.

(4) O le Pa i Leulumoega Fou ma le Taumua o le Vaa i le Fale Mataaga:

O le galuega na amata mai i le aso 13 Tesema 2021, na tuuina atu i le konekarate a le S.T. Faumuina Construction. Sa i ai nisi o itu na lape ai le faatinoga e le konekarate, ona faauma lea e le aufaigaluega a le Ekalesia (o loo i lalo o le vaaiga a le Failautusi Aoa). Ua mae'a le pa, ma o loo faasolo le galuega o le Vaa i lumā-maota o le Fale Mataaga, faamoemoe e fa'aaau i ai le auunaga a le Au Kamuta a le Ekalesia.

(5) Fale Fono:

O le galuega faafou i le Maota Fono o le Ekalesia na amata mai i le aso 4 Ianuari 2022. O le konekarate a le afioga Tauiliili sa galulue i le tino i totonu ma fafo, a o le konekarate a le susuga Anton na galulue i le atoina o le pa'u. O se galuega na mae'a lelei lona faatinoga, sa talafeagai lelei ma le usuia o le Fono Tele a le Ekalesia i lena tausaga 2022.

(6) Maota o le Faatonu A'oa'oga Kerisiano:

Ua faamaonia e le Fono Tele le vaegatupe \$200,000 mo le fausia o le maota fou o le Faatonu o A'oa'oga Kerisiano i Malifa/Maluafou. Ma ua i ai le faamoemoe pe a aulia i le alofa o le Atua le amataga o le tausaga fou 2023, ona faatino lea o le fausia o le maota fou. O le talaaga o le maota tuai, o se galuega sa fausia e le Matagaluega Apia Sisifo ma tuuina mai ai i le vaaiga a le Ekalesia Aoa. Ua tele afā malolosi sa fetia'i ma lena maota, ma faia ai galuega toe faafou i ni vaega talafeagai, i le faagasologa mai o le aufaigaluega: Uala Evagelia FT & Savaia (1970 - 1980), Laki Slade FT & Terri, (1980-1983), Aмоса Vaetoe FS & Punipua (1984 - 1991), Luapene Nepo FS & Faaolataga (1991-1997), Fuamai Samuelu FS & Rosa (1997-2003), Dr. Danny Ioka FS & Karen (2003-2008), Niutea Simanu FS & Sivaolei (2008-2009), Faitoaga Tolua FS & Temukisa (2009-2019), Maleifua Tanielu FS & Lavenia (2019 e oo mai nei).

TALA GALUEGA FALE FAIFEAU EFKS ASAGA, AMOA

O le sauniga e faapa'ia ai le galuega o le maota o le faafeagaiga o le EFKS Asaga, Pulega Amoa i le Matagaluega Faasaleleaga, na fai i le masina o Aokuso i le Aso Faraile 12, na ta'ita'iina e le Toeaina o le Pulega susuga Fiafia Toleafoa FT. Na faia leni sauniga i le taimi tonu sa toesea ai le afioga i lē sa avea ma Taitaifono Fono Tele i lea taimi, susuga Iosefa Atapana Uilelea FT ma le faletua ia Tekimatang, ona o nisi foi sauniga faapenei na valaaulia ai mai le Matagaluega Niu Sila i Saute. O le afioga i le Sui Taitaifono i lea taimi, susuga Tunumoso Iosia FT ma le faletua ia Susana sa auai e molimau ma fai ma sui o le Ekalesia Aoao e molioo le faamalo ma le faamanuia i le galuega ua faia e le au faatuatua. Sa faatasi ai foi le mamalu o le aufaigaluega o le Pulega, o lupe faalele a le Aulotu ma le afioaga o Asaga mai tafa e fia o le lalolagi, o uo, aiga ma paaga a le Aulotu ma le afioaga o Asaga.

O le faafeagaiga taulagi a le EFKS Asaga, susuga Faataualofa Mata'i FS (faletua ia Miri), na saunoa i le Tala o le Galuega. Ma e tusa ma le faatuatua masani o le Ekalesia, sa muamua lava ona saili i le Atua e ala i talosaga molia, lo latou faamoemoe ma le mana'o i le fia faaleleia o le galuega i le itu i fafo, aemaise i le 'uti'uti o le tamaoaiga tau tupe sa i ai e faatino ai. Na tali mai le Atua i le Aso Sa 20 Fepuari 2022, na fono ai le Ekalesia ma pasia le faia o se sailiga tupe o le Tausala i luga o laina Tafailagi. E ui ina sa fai le vavao a le malo ona o le faama'i Koviti 19, ae oo mai i le aso 29 Aperila na fuafua e fai ai le Tausala, ua toe tatala le vavao, ma sa faataunuu loa ma le fiafia. O le Aso Sa 1 Me 2022 na sosoo ai, na pasia ai loa le faatinoga o le galuega.

O le aso 16 Me na amata ai tapenaga o pemitā, o ata ma isi, ma le 4,500 piliki sa taina lava e fanau a le Ekalesia. O le aso 1 Iuni na amata aloaia ai le galuega, ina ua mae'a le sisiina a'e o le tagavai a le atunuu i lena vaveao, e faamanatu ai le 60 tausaga Tutoatasi. O le Tusiata le susuga Mafutaga Lavea Taumaoe, a o le Matuaofaiva le susuga i le A'oa'o Fesoasoani a le Aulotu, le fetalaiga i le matua ia Laulu Tautu, lagolagosua i ai le fetalaiga ia Ausia Manu. O le Falefa o le Aiga Salemalama, o tamalii, le Aiga Satuala, o failauga ma fanau a le Ekalesia. E lē sili le ta'i, nai lo le tapuaiga a tamā o le nuu ma le Ekalesia, e le'i manofonofa o oo i tina ma fanau sa togimaa uma, e ala i feau sa tofia ai.

O le Tala o Tupe o le galuega:

Tupe faamauina i le aso o le Tausala = \$112,464.10

Tino i tupe na aoina mai	= \$100,764.10
Toomaga (mai le Ekalesia)	= \$30,000.00
UTOS	= \$8,000.00
Mafutaga Tina	= \$3,000.00
Autalavou	= \$7,000.00
Tusitupe Sene	= \$4,760.00
Tusitupe Atina'e	= \$8,299.00
10% Taulaga Samoa 2021	= \$3,362.35
Autaumafai	= \$1,200.00
Pusa Pisupo & Pusa Apa	= \$2,274.00
Asiga	= <u>\$1,850.00</u>

Aofaiga Tupe na maua = \$170,509.45

O le Tau atoa o le Galuega = \$179,508.10

O lona uiga o le Aitalafu o loo i ai e \$8,998.65, afai e faapoopo i ai le Toomaga e \$30,000, ona maua lea o le Aitalafu atoa e \$38,998.65 (e lē o faitauina ai meaalofofa a le au valaaulia, ma le ma'au o le Ekalesia na tauaaoina i lena aso). Na tauluga le saunoaga a le susuga faafeagaiga i lana faafetai faavae i upu a le aposetolo, "*Aua pe a ou vaivai, ona ou malosai ai lea.*" Na ia ta'utino sa lagona le vaivai ina ua vaai atu i le tulaga maualalo sa i ai le tino mai o mea, a e na tupu le malosai ma le mafanafana i le fesoasoani mai o le Agaga o le Atua, o Lona mana na faaosofia ai le faatuatua e tauivi ma taunuu ai faamoemoega. Ia ia te Ia le viiga e faavavau.

Na saunoa le susuga Tunumoso Soliola Iosia FT e faafetaia le susuga faafeagaiga ma lona faletua, o le mamalu o le EFKS Asaga, le Matuaofaiva ma le aiga, ma le lagolago a le afioaga aemaise o ana lupe faalele mo le Tala Lelei ma sailiga malo. O se tasi leni o tino vaaia o le soifua fai taulaga o le au faatuatua, e ala i galuega faatino e pei ona molimauina i leni aso. Aemaise i aso faigata o tapu ma vavao o faama'i pepesi, ua afaina le tamaoaiga ma taugata le soifuaga, o aso e tula'i mai ai le auro moni pe a tofotofoina i le afi. Fai ma viiga o le Atua le soifua faatuatua fai taulaga, ma ia 'aia le gata ai, auā e le uma foi le foai faamanuia mai a le Atua. Na 'au'au le saunoaga a le afioga i le Taitaifono Fono Tele ia Iosia, i lona tauaaoina atu o le \$10,000 meaalofofa a le Ekalesia Aoao. Ia faamanuia le Atua.

FAA-ATOATOAINA&FAAPAIAINA

“¹⁴Auā o le taulaga e tasi, ua fa’aatoatoaina ai e Ia e faavavau o e ua faapaiaina.” Eperu 10.

Soia e te faavaivaia oe ma tuuina ifo lou tagata i lalo i lou faapea ane, “O a’u le tagata toilalo ma pa’ū soo, o lona uiga o a’u o le tagata leaga e lē lelei. Ou te lē mafai ona fai se mea sa’o.” Pe afai e te lagona faapena, ma tautala soo ai faapea, ua aveva ma ou talitonuga, o le a faapea foi ona e maua gofie ni faamaoniga e saga faamautū ai. O loo tusia e le alii tusitala lauiloa o Risati Karosone: ‘O lou tuua o oe i lalo, na te faamalosi atili a e lē faasa’oina ai o ou vaivaiga, ina ua tuu faalētatau le faamamafa ma le malosiaga i mea uma e sesē, nai lo i mea e sa’o faasino ia te oe. Aiseā e te faia ai lena mea ma lou mautinoa o le i’uga e tasi, o se vaai e lē lelei, o isi lagona lē lelei e faaopopo, ma faaitiitia lou talia ma le faafetai o mealofoa o le ola? O tagata e fai ma latou masani le faaitiitia o lo latou tāua ma tuu ifo i latou i le tulaga maulalo, e ta’ua ma faalupe o le ‘au fāitio, e ese mai ai faata’ita’iga leaga ua latou fai. E tofi tagata uma ma se tulaga e mana’omia le faaleleia, a e lē aveva lena ma mafuaaga e te saga sasa faapologa ai oe.’ O loo faapea mai le afioga paia a le Atua, “¹⁴Auā o le taulaga e tasi, ua **fa’aatoatoaina** ai e Ia e faavavau o e ua **faapaiaina**.” Eperu 10. Ua faamamafa ma vase le upu **‘fa’aatoatoaina’**. E lē o le faaleleia pe o le faafeoloolo. O le Atua na te lē faaleleiina ia feoloolo pe faasili atu; na te fa’aatoatoa. Na te lē faaopopo tau ina sili teisi; a e na te fa’aatoatoa ia mae’a lelei. O le upu moni, o loo i ai lava le lagona ia i tatou o tagata lē atoatoa. O le upu moni lena, auā tatou te faia pea mea sesē, o le tagata na faia i le efuefu. Tatou te tautevateva pea. Tatou te faia pea mea tatou te lē manana’o e fai, “¹⁵Auā ou te lē iloa mea ou te faia; auā o le mea ou te faia ou te lē loto i ai, a o le mea ou te ‘ino’ino i ai o lea ou te faia.” Roma 7. Ma o le vaega lena o tatou tagata, lea ua faapaiaina. Peita’i, pe a oo mai i le taimi o lo tatou tutū i luma o le Atua, o i tatou lava o tagata ua fa’aatoatoaina. Pe afai e silasila mai le Atua ia i tatou taitoatasi, e sisila mai o Ia e ala mai i fofoga o Lona Alo o Iesu Keriso, ma na silafia mai ai se tagata ua atoatoa, ina ua fa’aatoatoaina e Ia e toatasi e atoatoa – o Iesu Keriso lo tatou Alii, e ala i le taulaga e tasi o Lona maliu i le satauro. Ioe, e ao ona tatou fa’aauau pea le tiute o le taumafai malosi e faalelei atili o tatou olaga; a e ua faasusulu mai le afioga a le Atua i o outou aao ma o’u nei vae, ina ia fai fai mālie, faato’ato’a ma fai mālū faiva. E i ai mōlī lanu mūmū i le ala. Fai ma taofi, tu ma faatali. Ia faamanatu ia te oe, “¹⁰ua outou oofu i le tagata fou, o lē ua faafouina i le iloa, e faatatau ia foliga i lē na faia o ia.” Kolose 3.

UA TUU TONU OE E LE ATUA IINA

“¹⁴E iloa foi e ai po ua fai oe ma masiofo ona o se aso faapenei?” Eseta 4.

O le tala ia Eseta na te a’oa’o mai nisi o mea moni tau le soifuaga pei o nei:

(1)E te mana’omia ni faia’oga/fautua/faatonu lelei. Na tofia “⁷Moretekai ma tamā o Hatesa, o Eseta foi lea, o le afafine o le uso o lona tamā, ina ua leai sona tamā po o sona tinā.” Ese. 2. Ma na aveva le faalogo lelei ma usita’i o Eseta ia Moretekai, na ia iloa ai o lona valaauina e lē na o le aveva ma masiofo a le tupu, a o le faaola mo lona aiga ma lona nuu. Ia, o ai lau Moretekai? O ai na te silafia lelei oe e faamaonia lou valaauina ma fesoasoani ina ia faataunuina lou tofi? O ai e alofa faamaoni ia te oe, na te lu’iina oe ina ia e faamalosi ma finau pea, pe a e toilalo ma sesē, pe ua faavaivai ma tauau ina si’ilima? O itu tatou te tauaso ai, tatou te mana’omia ai ni tagata vaai manino ma vaai toto’a, o tatou tausoga, o uo ma paaga e silasila mamao ma faauta loloto, e tautala ma fautua mai i o tatou olaga. O Iosua na faalogo ia Mose. O Timoteo na faalogo ia Paulo. O Ruta na faalogo ia Naomi. O ai o loo e faalogo i ai? A o fai oe ma Moretekai lelei i nisi? (2)E te mana’omia le iloa lelei, ua e i ai i le tulaga tonu e finagalo ai le Atua mo oe. O Moretekai le tausoga o Eseta, na ia lu’iina le tama’ita’i lalelei, le teine usita’i ua faaeaina, ma suia lona olaga ina ua ia togi i ai le lu’i, E iloa e ai pe na fai oe ma masiofo ona o se aso faapenei? E ese le faamoemoe na oo ai Eseta i totonu o le maota o Asueru le tupu, ma ia saofa’i i autafa o le nofoalii mamalu. A e ina ua aveva o ia ma masiofo, sa mana’omia lona filifili lelei, i le va o lona nofo lelei i lona sone saoloto ma saogalemū, ma lona valaauina moni e fai ma lavea’i o ona tagata. O la tatou filifiliga foi lea e ao ona fai, ina ia faamuamua le manuia ma le saogalemu o isi, nai lo so tatou lava lelei. Pe afai e te fesili ifo, “O le a tonu lo’u valaauina?” Atonu e aafia ai lau galuega, o lau faaipoipoga ma au faiga paaga, o ou tiute faa-matua. Mata o loo i ai lava i lou lotoifale, i lou tuaoi ma le siosiomaga o loo e soifua ai, aemaise i totonu o lau aulotu ma lau ekalesia ua ofoina atu ai lau tautua. Po o fea lava o i ai lou valaauina, e tasi le mea ua mautinoa: pe afai e valaau mai le Atua, o lona uiga ua oo mai lou taimi. E faaosoosoina oe i le manatu, o oe ua na o se utu vai i le taimi nei, na o le tapena ma faatalitali, na o le lagolago i isi tagata autū, e i ai se isi aso a sau, se isi taimi e sili ona tāua a taeao, o se isi avanoa e sili ona fetau. E leai! E te lē faia le filifiliga po o le a lou taimi; o le tiute lena o le Atua! Fai mai le fai Salamo, “¹⁴O oe lava lo’u Atua. ¹⁵O loo i ou aao o’u aso.”

E iloa e ai, pe na tuu oe iina, ma a’u iinei e le Atua, ona o le faaolataga o fia fai mo tatou tagata i nei aso?

O LE PEROFETA MULIMULI

(O le Tala Faafagogo faasolo ua faaSamoaia mai le tusi, 'The Last Oracle' tusia e James Rollins)

Na latou taunuu atu i le tulimanu mamao, ona amata lea ona faatifa ifo o le auala mai iina. Mai le maualuga o le tulaga na latou i ai, na vaai atu ai Monike i se ālia faa'ofu'ofu tele, ma se aai ata manaia o laina faleoo ma latou taualuga uumi faapea pusa o togalaau. O mōlī auala vali uli sa emoemo mai ai aloiafi o kesi. O se falea'oga fogāfale tolu na tumu ai le tasi tulimanu o le aai, si'osi'omia e malae taalō ma se malae mo faafiafiaga lautele. O le aai itiiti lenei sa faataliolio faataamilo i se sikuea ogatotonu, o i ai se vai puna umī o puna ma sivasiva feilafi mai ai le vai.

I le isi itu mamao ese atu o le aai, sa ea a'e ai laina faasolosolo o fale e nofoia e tagata, e ta'i fogafale lima, e faatāfāfā tutusa i se faataatiaga fuafua lelei. Sa pogisā aunoa ni mōlī, o se faalogona tuulafoa'iina na si'omia ai.

E ese mai ai le aai o i lalo ifo. Sa milo solo tagata ma le atuavale. O leo tetele tauvaalau fetalā'i solo. Na ia vaia tamaiti o faaputupu faatasi i o latou ofu moe, o milo faatasi ma tagata matutua o nisi sa pei o latou la'ei na fai, faato'a feala mai sa momoe. O isi sa ofu toniga lanu efuefu ma latou pulou malō. Sa fepasia'i solo le sulu o mōlī uila i auala va-aapiapi. E i ai se mea ua vevesi ai le aai.

Na ia faalogoina le tauvalaau o igoa, o nisi e faatauanau, o nisi e to'atama'i.

“Konesetatio! Piota! Kisika!”

O tamaiti.

Na lelea faalo'ulo'u a'e i luga se malamalama faailoilo lanu mūmū, na suluia atoa ai le aai itiiti o momoe, ma faailoa ai le taatitia mai o fale i ona tala atu, o le afi o sivasiva i luga o pa simā ma faamalama mata pūiti.

Na mulimuli atu le vaai a Monike i le mūmū o le sulu felea a o taunuu i lona tumutumuga, ua pa a'e ai se parasuti, ma faatafea ifo ai i lalo.

Sa tumau pea le pupula a Monike i luga.

O le vanimonimo... e lē na ona aunoa ma se masina. A e sa le'i i ai atoa se vanimonimo.

O le pupula malamalama o le sulu na faailoa ai se fale faapūlou tele fausia i papa, o loo faasosolo maualuga a'e i itu uma, o loo ufitia ai le nofoaga atoa. Na matala le gutu o Monike i le maofa, ma tifa tifa solo faataamilo.

Latou te le'i oo lava i fafo.

O loo latou i ai pea i totonu o se ana mata'utia ma le telē.

O se ana na fausia e tagata, mai foliga vaaia o le taualuga ma puipui.

Na ia faatau pupula ifo i le aai maopoopo lelei, o loo faatumauina ma faasao i totonu o le ana e pei o se vaa i totonu o se fagu. A e peita'i, e lē o se taimi lenei mo se maimoaga.

Na toso atu o ia i lalo e Konesetatio i tua o se pupuvao ua ola i autafa o maa. E tolu ni sipi na feosofi lemū atu i le auala faatifo aga'i atu ia i latou, na pasia i latou, ma faasolo atu i le itu o i ai le falema'i. O taavale e pei sa ola i le eletise ma sa faatautaia e tamaloloa o laei toniga, o i ai a latou auupega o laau malolosi.

E lē se vaaiga lelei.

Ina ua te'a ese atu taavale, na tusi ese le lima o Konesetanino mai le aai, ae faasino atu i le pogisā o le ana o i le loloto. Na latou sopoia le laufanua ma'ama'ā ma latou tau mai i se auala vaapiapi, e foliga mai e seāseā ona fa'aaogāina.

Na latou faataamilo i le aai, a o latou faatau pipii i augutu laualuga o le ana. Na maitauina e Monike se isi auala i le itu mamao atu, sa faamalalama e moli eletise, ma sa lokaina e faitoto'a uamea lapopo'a, o le lautetele sa mafai ai e loli simā tetele e lua sa o faatasi ona ofi ai. O le faailoga o le auala e ulufafo ese atu ai.

Peita'i, na ta'ita'i o ia e tamaiti i le isi itu faafeagai.

O fea a latou ave i ai o ia?

I o latou tua, na pa a'e ai se leo faailoilo, na taia ma tapunia ai le faalogo pei o le 'e'ē o sailini o vaalele tau i osofaiga i totonu o le si'osi'omaga o ufitia. Na tau fai liliu uma i latou e to'afā. O se sulu lanu mūmū na pupula a'e ma faataamilomilo solo i luga o le lotoā o le falema'i.

Ua silafia e le nuu le isi mea mata'utia o loo tupu.

E lē na o tamaiti ua leiloloa.

Na taumafai Monike e ta'ita'i ifo tamaiti i le auala i ona lima, peitai o le leotele na'uā na faatumulia ai le nofoaga na faigatā ai. Auā sa punitia o latou taliga i o latou lima, ma pupuni o latou mata. Na pei e ma'i Kisika i lona manava. O Konesetatio ua tootuli, taavilivili. O Piota na ia matuā fusi mau ia Monike.

O lagona ma faalogona fesoota'i.

Ui i lea, sa uuna'i atu pea e Monike i latou i luma, a o ia amo Piota, ma toso atu Kisika.

Na tepa i tua Monike i le sailini emoemo. Atonu ua na lē toe manatua se mea – pe faapea foi, ua matuā aveese faamalosi lona manatua – peitai e tasi le mea ua ia mautinoa lelei.

O le a ia leiloa isi mea uma e sili atu nai lo lona manatua, pe afai e toe pu'eina o ia.

Na ia fefe foi i tamaiti pe afai e toe maua i latou.

E ao ai ona latou o atu pea i luma – a o le fesili, e o i fea?

6 Setema, 5:22 taeao.

Kieva, Ukureini.

Na faatali Nikolao Solokovi seia mae'a tapena lelei mea pu'eata. Ua uma ona faamanino o ia ma o loo laei pea lona kola pepa o loo tui i totonu o lona ofutino pa'epa'e masoā e puipuia ai ne'i pisia mai le fasi keke a le teuteu ofu lona ofutino ma lona suti lanu moana. Na ia solomuli teisi atu mo sina minute toatasi e asi ai i totonu o potu o le falema'i. O le au faasalalau tala fou sa tapena pea a latou tala o le taeao i luga o fasitepu o fale o tamaiti tausi.

I potu i tua o le Aiga o Tamaiti Kieva, sa susulu atu ai le la i ona faamalama maualuluga. O se tamaitai tausi ma'i e toatasi sa fealua'i solo i le va o moega. O iinei sa natia ai tamaiti ma ma'i e sili ona ogaoga: o se teineititi e lua tausaga ma se tuma i lona fa'a'i e le'i mafai ona tatala, o se tamaitiiti sefulu tausaga mo sona ulu ua fefete mai le tele o le suavai, o se isi tamaitiiti ma ona mata sa faanenefu i le malosi o le ma'i faalemafaufau.

O le tamaitiiti mulimuli sa fusi atoa ona lima ma vae. O le tamaitai tausi ma'i, o se Ukureini foliga faatafafa i ni ofu faigaluega lanu moana, na ave i ai lana vaai. "Ina ia lavea'iina ai o ia mai le faamanu'alia, lau afioga i le Senatoa," na ia faamatala ane ai, ma ona mata ua lē lavā pupula i puapuaga mata'utia.

Peitai sa i ai nisi ma'i e sili atu ona mata'utia le leaga. I le tausaga 1993, na fanau ai se pepe i Molotova e lua ona ulu, lua fatu, lua ivitū, a e na o le tasi le seti o ivi. Sa i ai foi le isi tamaitiiti na fanau mai o i fafo lona fai'ai mai lona atigipoo.

O aafiaga uma o Kenopili.

I le tau o le tologo a'e o le 1986, na pa ai le tane numera fa o le Fale Niukilia o Kenopili i le leva o le po. I totonu o aso e sefulu, na salalau ai le malosi o le kasa e tusa lona malosi ma le fa selau pomu atomika na tu'i ai Hirosima, na faataamilo i le lalolagi

atoa. E oo mai nei, e tusa o faamaumauga a le Faalapotopotoga o Su'esu'ega Faafomai a Rusia, e silia ma le selau afe tagata ua maliliu mai aafiaga o kasa oona, ma le isi fitu miliona, o le toatele o tamaiti, o loo ave ai pea le talaaga o ma'i kanesa ma itutino lē atoatoa.

Ma o lenei ua amata le galu lona lua o le faafitauli, o i latou sa aafia a o iti, ua matutua ma fai a latou fanau. Ua faamauina le siitia o faaletonu i le fananau mai i le 30 pasene.

O le mafuaaga tonu lena na malaga mai ai le ta'ita'i ma'ema'eā ma lauiloa o le maota mauilalo o le Palemene o Rusia. O le itumalo o Nikolao o Teliapino e faitau afe lona mamao ese, peitai e tutusa lava o latou aafiaga. I Atumauga Urale i lona itumalo, o le tele o alala tafuafi mo Kenopili sa maina, faatasi ma le minerale o le pulutonia mo polokalame o auupega meatau a Rusia. Sa ave o se tasi o nofoaga e ola malosi ai le kasa oona faa-niukilia i luga o le fogaeleele.

"O lea ua sauni i latou mo lau afioga, le alii Senatoa." Na fai ane ai lana failautusi.

Na ia liliu atu faasaga i le tamaita'i.

O Elena Oserova, o se tamaita'i pa'e e lauulu pāuli, sa i le luasefulu o ona tausaga, sa laei lona suti pisinisi lanu uliuli, atagia mai ai se tagata e le'i taitai agavaa mo ni faiga paaga. O se tamaita'i mata'alia ma mata paū, e i ai i ona autafa i taimi uma. E valaau e le au tusitala o le Rasaputo a Nikolao, o se mea na te le'i faavaivaia.

Sa sologa lelei mea uma faatasi ma ana fuafuaga faapolotiki ina ia iloa o ia o se taitai malosi e faia suiga, e faalogo pea i tua i taimi o le mamalu ma le maualuga o pulega a le tupu sā o le Emepaea o Rusia. E oo i lē o loo faaigoa ai o ia, Nikolao le 2, le tupu sā mulimuli o le pulega faa Romanova, na falepuipui ma fasiotia i Iekaterinipeka, le mea sa fanau ai Nikolao. E ui ina sa lē manuia le ta'ita'iga a le tupu a o soifua, a e mulimuli ane i lona maliu, sa faapa'ia ma faailogaina o ia o se tagata paia e le Uluai Ekalesia Rusia. Na fausia e felela ma pātele le fale tele auro faalo'ulo'u e ta'ua o le Malumalu o le Toto, i le nofoaga na fasiotia uma ai lona aiga. O lena fale na fausia, na tula'i mai o se faailoga vaaia o le toe fanau mai ma tula'i mai o le ituaiga Romanova.

Na faapea nisi, o le senatoa fasefulutasi tausaga o Nikolao Solokovi, ma lona lauulu momoe uliuli ma le soesā pi'o pu'upu'u, o le tupu sā lava lea ua toe fanau mai.

Na ia faamalosiā ma fiafia tele i leni faatusatusaga. A o taumafai Rusia e toe tula'i mai i ona vae māluelue – o loo pologa i le mamafa o aitalafu ma le tele o le mativa, faatumulia i soligatulafono ma faiga pi'opi'o – sa ia mana'omia tele se ta'ita'i fou mo leni meleniuma fou.

Ma o le faamoemoe o Nikolao, o ia le taitai lena.

Ma sili atu.

E le'i faalavelave o ia a o tago atu Elena e 'eue ese taaiga pepa sa taamilo i lona ua. Na vaai Elena ma siaki atoa i luga ma lalo, ona geno atu lea ia Nikolao ua lelei mea uma.

Na laa atu Nikolao aga'i i molī o loo faatali mai mo ia i fafo.

Na ia tūlei ma ui atu i faitotoa, a o mulimuli atu ai Elena. O le pulelaa sa i le pito i luga o fasitepu, na teuteu ma tusia ai le igoa o le fale mo tamaiti sa i ona tua.

Na savali atu i le putuputu mai o maikorofoni faaleotele leo i luga o le pulelaa, ma sii atu lona lima i luga e taofi le tele o fesili ua amata ona saputu mai. Na ia faalogo atu i se tasi tusitala o fesili mai i ona sootaga ma le fitafita nanā a le Keremelini, o le isi e uiga i aafiaga tau tupe o lona aiga i galuega ma atina'e i Atumauga o Urale. A o faasolo a'e lona tula'i mai i le pule ma le paoa, sa faapena foi le faasolo ina leotele mai i latou na taumafai e toso ifo ia i lalo.

Na ia lē amanaia nei fesili uma a tusitala, a e ua uma ona seti lana polokalame.

Na ia sōsō atu i le faaleoteleleo, ma valaau faapā atu lona leo tele, "Ua oo mai le taimi e tapuni ai faitoto'a nei!" na ia valaau atu ai, a o tasi lona lima i tua i le auala e taunuu ai i fale o tamaiti.

"O tamaiti o le Ukureni, o Pelarusi, atoa uma ma Tina Rusia, ua leva ona puapuagatia mai agasala o lo latou tuana'i. E lē toe tupu!"

Na tuu atu e Nikolao lona to'atama'i ia tatagi lelei. Na ia iloa foliga i luga o meapu'eata. Foliga malō o suiga ma le ita tele. Na ia fa'auau lana faaoololoma'au mo se vaaiga fou mo Rusia, o se valaau ina ia tula'i mai ma faagaioi, o se valaau ina ia taga'i toto'a i le lumana'i, a e lē faagaloina foi le tepa i tua.

"O lona lua o aso o i luma, o le a ufitia atoa ai le afi lona fa i Kenopili, e ufi i se fale uamea fou. O le Sakofagu fou e faailoga ai le i'uga o se faalavelave mata'utia, ma o se maa faamanatu e faavavau mo alii ma tamaiti uma na tuu atu o latou ola e puipui ai e lē gata o le Faatina ia Rusia, a o le lalolagi atoa. O le au fuimū na latou tutū faamalosi ma onosa'i ma

latou faagā'au a o susunu ese e kasa oona o latou lumanai. O pailate na faaositaulaga e ofo o latou ola e toso mai taga simā ma isi oloa. O tagata 'eli maina mai itu eseese o le malo na latou o mai e fausia le uluai talitā e puipui malu ai le afi ma masini. I latou o alii ma tamaiti mamalu, e maualuga ma malosi le noto nuu, o i latou o le fatu moni o Rusia! Ia 'aua ne'i o tatou faagaloina i latou, faapea la latou osiga taulaga!"

Na faatuputupula'ia le toatele o tagata a o saunoa Nikolao. Na faafiafiaina o ia i le patipati ma le valaau fiafia o tagata ina ua uma lana saunoaga.

O le saunoaga amata leni o le faasologa o isi ana mau saunoaga e tele o le a fai, seia oo atu i le sauniga aloaia i Kenopili, e faataavale atu ai le Sakofagu fou i luga o le kasa ma otaota o le afi ua mate. O le uluai talitā simā ua amata ona to'ulu, sa fuafua na o se mea lē tumau, i le luasefulu tausaga talu ai. O le Sakofagu fou e sefuluvalu afe tane le mamafa ma o lona umi e tusa o le 'afa o le taoa Eifeli i Pale. O le galuega e mafai ona fe'vea'i aupito mamafa leni i luga o le paneta.

E toatele isi au polotiki ua fai a latou faalauiloa ma faatosina faapenei. Peitai o Nikolao sa aupito sili ona leotele ma malosi ana metotia, o le siamupini i mataupu o le toefuata'iina o le niukilia, e faamamā ai faamoega o kasa oona ma vailaau i totonu o galu o le 'ea, i totonu o le atunuu. E toatele na taumafai e faaleaga ana lauga ona o le taugatā. O sui o lana lava palemene sa inoino ma faaleaga o ia i nusipepa ma auala o fesootaiga.

Peitai na iloa e Nikolao e sa'o lava o ia.

O le a latou iloa lava i se aso.

"Ma ia maitau lelei mai a'u upu!" na ia fa'auau ai. "E moni ua tatou faai'uina se tasi o lautusi o lo tatou tala faasolopito, a e ou te fefe ua na ona tatou tuu lo tatou tamatamailima i le pu o le faaputuga palapala. O lo tatou tuanai niukilia e le'i te'a ese ma i tatou... faapea le lalolagi. Pe afai e oo mai le taimi, ou te faamoemoe tatou te faaali atu le loto tele ma le loto nuu e pei o i latou alii ma tamaiti na tuuina atu lo latou lumana'i i lena aso. O lea ia 'aua ne'i o tatou lafoa'i le meaalofa ua latou aumaia. Ia tatou faia se Faafouga fou! Mai le afi, e fanau mai ai se lalolagi fou."

Na ia iloa na emo ona mata a o ia tautala atu i upu mulimuli nei. O le upu faavae lea o lana toe fuata'iga. O se Faafouga fou. Se Faafouga Rusia.

Pau le mea e manaomia o sina tūlei i le itulagi sa’o. Na faalagolago atu Elena ia te ia, tago atu i lona tulilima, e fia fai atu i ai se tala. Na ia faalo’ulo’u ane i ai, a e pa loa se fana mai le auala. Mai lona si’umata, na ia pu’ea ai le ‘emo o le pa o le fana ma le ututau, i ni nai sekone a o le’i pisi atu i autafa o lona taliga. O se tagata fana lafilafi.

O se fasioti tagata totoi.

Na toso ifo o ia e Elena i tua o le pulelaa a o fe’ei ma fetagisi leotele solo tagata. Na pulea e le fememea’i mo sina taimi itiiti. Na fa’aaoga lelei e Nikolao le avanoa e olo atu ai ona laugutu i laufofoga o Elena. Na selu atu ona lima i lona lauulu uumi; na faataamilo le isi ona tamatamailima i le uamea fai ta’otoga mālūlū sa faapipii i tua o lona taliga.

Na ia musumususu atu a o la’ua feasogi.

“Manai le fetau lelei.”

10.25 afiafi

Uosigitone.

Na faatasi atu Penita ia Karai i tafatafa o le faitoto’a i luma ma faatautetē i le ata o le vito. Na ia iloilo lelei le au leoleo o loo taofia faasilima.

Na valaau ifo i le fatoto’a le tamaloa o loo lilo i le ataata, e peisea’i o loo ia lagona lo latou auai. “Matou te lē o mai i se faalavelave,” na ia faapea ane ai, i le ma’ati o lona leo, e iloa ai o ia o se Palagi Sasa’e. Na faatau sisila Penita i le tagata ese i luga o le ata. Ona faasolo atu lea i le teineitiiti o loo tu i ona autafa, ma ‘u’u lona lima. Sa ia pupula sa’o lava i le mea pu’eata o natia.

Na toe valaau atu le tamaloa. “O matou o le vaega a Atipale Poleki!” Na pei e lē mautinoa ia te ia lona leo, e peiseai na te le’i iloa o i latou o i totonu o le fale sa lilo ia i latou le uiga o ana upu. “E lē tele se tatou taimi o i ai!”

Na faamalumu ifo Elisapeta i tua o Penita. Na la’ua faasoa la la’ua vaai. Pe afai e i ai ni tali faasino i le taunuuga o lona tamā, e i ai aulape e ao ona uia. A e ia ‘aua ni aulape tetele. Na oomi e Penita le ki o le sipika ma tautala i ai.

“Afai tatou te vaega, ona faasaoloto lea o matou tamaloloa ma faataatia ese a outou meatau.”

Na lūlū le ulu o le tamaloa o i luga o le polotito. “E leai, se’i vaganā ua mautinoa e talitonuina outou. E tele le lavelave na matou uia ona o le aumaiga o le teine iinei. Ua faa-tatala atu o matou tino.”

Na tilotilo atu Penita ia Karai. Na faamimigi ona tau’au.

“O le a faataga mai outou i totonu,” na fai atu ai Penita. “A e na o oe ma le teine.”

“Ma o lea o le a taofi iinei au tama ia ina ia mautinoa lo matou saogalemu.”

Na tomumu lemū Koualasaki i o latou autafa. “O se aiga toatele fiafia.”

Na geno atu Penita ia Karai ina ia ave Elisapeta i le tulimanu.

Na tausisi Penita i le itu o le faitoto’a. O Koualasaki na tu mai le isi itu, na o ona totini. Na ia sisi a’e i luga lana auupega e tasi sa i ai: o lona seevae.

Ua lava lena.

Na ave’ese e Penita le loka, ma faamatala itiiti le faitoto’a. O le tamaloa ese na sii a’e i luga lona lima e faailoa ai o loo gaogao. Na ‘u’u e le teine le isi ona lima. Sa foliga mai e i lalo ifo o le sefulu ona tausaga, lauulu uliuli sa ofu i se ofu tusitusi faa-laupapa-mu enaena ma uliuli. O le tamaloa sa foliga olive i se ataata mamafa o le ta o le lima. A lē o se Aikupito o se Arapi. O ona mata, enaena malosi pei e uliuli i le susulu o le moli o le polotito, na pupula mai ua vaivai i le fefe. Na ia la’ei le ofuvae ma le mitiafu pāuli.

Na liliu le ulu o le tamaloa ese, a e le’i te’a ese ona mata mai le faitoto’a. Na ia ‘e’e’ atu i lana vaega. Sa le’i malamalama Penita i le gagana, a e na mate’ia o se faatonuga ina ia mataāla ma nofo sauniuni, mai lona leo.

“O se Kipisi,” na gugulu ane ai Koualasaki.

Na tepa ane Penita i le tamaloa latele.

“Sa nonofo ma lona aiga i le isi itu o le auala na matou nonofo ai.” Na si’i a’e le lima matua o Koualasaki i le tamaloa. “O le faa-Romani lea sa tautala mai ai.”

“E sa’o,” na fai ane ai le tamaloa. “O lo’u igoa o Luka Heni.”

Na tatala faavā-tele e Penita le faitotoa, ma geno atu i le tamaloa e o mai i totonu.

Na sitepu ane le tamaloa i totonu ma le faaeteete, ma luelue atu le faatalofā ia Penita ma Koualasaki. “Sasetimosi.”

“Naisa tuke” na tali atu ai Koualasaki. “A e ina ia e silafia, na o le pau lena o le faa-Romani ou te manatua.”

Na ta’ita’i atu e Penita ia Luka ma le teine i tua i le potu malolo autū. O le teineitiiti na migoi lava ma le gatete o ona lima. O ona foliga sa pei e ufitia i se ataata. Na tilotilo atu Luka i le tu mai o Karai i le isi itu, o loo ‘u’u lana fana.

(fa’auau Sulu Samoa Novema 2022)

KOLISI FAAFAIFEAU MALUA

LISI O E UA FAAMANUIAINA I LE SUEGA ULUFALE 2022

Suafa

1. Amelika Tuimalatu
2. Asiel Daniel Tautiepa
3. Clifton Gosta Sa'e
4. Eseneiaso Walter Fanolua
5. Faiāuga Aloaina
6. Fatutolo Tuisuga
7. Fereti Faifua
8. Hamatapu Ete
9. Heti Leilua
10. Iafeta Tafunaina
11. Iefata AFatia Afualo
12. Juergen Faamau
13. Lafaele Lapi
14. Leilua Faamate
15. Malaetele Aiiloilo Uelese
16. Manututuila Lasi Sooalo
17. Molese Sagapolutele
18. Misela Lauluniu
19. Mualia Chromatic Semitone
20. Nicholas Nanai Sio
21. Nomeneta Alapati
22. Raiseinland Iose
23. Sosopo Mose Aiafi
24. Talaia Reginald Talaia
25. Tavita Arona
26. Toeupu Kaisara
27. Tuifao Masani
28. William Maligi Finau

Matagaluega

- Apia i Sasa'e
Kuiniselani
Aukilani
Vaimauga
Malua
Niusaelese
Vitoria
Faleata
Manukau
Niu Sila i Saute
Laumua o Aotearoa
Apia i Sasa'e
Faasaleleaga
Kuiniselani
Faasaleleaga
Hawaii
Hawaii
Faasaleleaga
Laumua o Aotearoa
Kuiniselani
Aana
Manukau
Aana
Niusaelese Sisifo
Malua
Aana
Niusaelese
Vitoria

Faafetai

Vaitusi Nofoaiga (Pule o le Kolisi)

O E U A F A I L A G I F O L A U G A

VAOVASAMANAIA LAPI FILO

(1/9/1959 – 27/8/2022 (62+11+27))

Na soifua mai Vaovasamanaia i Vaitoomuli Palauli. O ona matua: o le tamā - Seumanufagai Filo Seumanufagai Faamasani; o le tinā - Eti Ah Loon Seumanufagai Filo. Na soifua mai i le tausaga 1959, i le Aso Lua, 1 Setema, a e na tuua le malo i le Aso Toonai, 27 Aokuso 2022, ua atoa ai le 62 tausaga, 11 masina ma aso 27 o lona soifua. Na faaipoipo atu ia Faaeaifaleupolu Lapi Filo. E to'a tolu o la alo, ma fanau a lana fanau e to'a fa. E to'a fitu ona uso, ma tuafafine e to'a ono. Na amata a'oga mai Palauli se'ia oo mai i le Matātā Eeseese i Vaivase (TTI, 1977-1978).

Sa malaga Vaovasamanaia i Amerika ma galue ai i le US Army 1980-1984. Na toe foi mai i Samoa ma galue i le Matagaluega o Leoleo ma Falepuipui, mai le tausaga 1988 seia oo mai i le aso na faamanava ai e le Atua ana galuega 27 Aokuso 2022. Na tofia le afioga Vaovasamanaia Lapi Filo e le Matagaluega Leoleo e nafa ma le faafeaoina o le afioga i le Palemia o Samoa, o Tuilaepa Dr. Sailele Malielegaoi. Faato'ā mapu mai Vaovasa mai lea tiute ma le galuega, ina ua pa'ū le vaega faaupufai a le HRPP, ma toe fa'aauau ai loa tiute o Vaovasa i le Matagaluega a Leoleo, i lona tulaga o le Komesina Lagolago. Malo le galue.

Na ulufale mai Vaovasamanaia Lapi ma le aiga i le matou Aulotu i le tausaga 2004, ma galulue ai i le EFKS Apia-uta o se aiga fesoasoani. O le tausaga 2005 na faaetia ai Vaovasamanaia ma le faletua i le tofi tiakono. O se aiga e masani i le tautua lotu, e lagalaga mea lelei Vaovasa toe fai mea lelei. O se tamā e tū mamā, lelei tapena ona la'ei i soo se taimi, e faafeiloa'i mai lava i lana 'ata, e lē iloa ni ona foliga ita pe fa'a'ū'ū. O se aiga e tausi faifeau, ua lē gata ia i ma'ua i Apia-uta, a o Savaii foi ma faifeau a lona faletua i Satapuala.

Na filifilia Vaovasamanaia e fai ma Fofoga o le matou Ekalesia mai le tausaga 2012, se'i oo mai lava i lona tu'umālō. O se tamā e savali i ana upu ma leo tetele ana galuega. Sa fai o ia ma usufono i le Fono Tele i Malua i le 2006.

Na aumai i tua lona tino maliu i le aoauli o le Aso Sa, 18 Setema 2022, ona fai lea o lona Sauniga faaleaiga i le malumalu i Apia-uta. Sa ta'ita'ia lea sauniga e le susuga Toeaina Faatonu o Fili Matalavea FT, lauga le toeaina faatonu o Faleulu Malaulau FT, a e tatalo le susuga i le faafeagaiga o Filo Tauaivale FS mai Amerika.

Na malama le taeao o le Aso Gafua 19 Setema, ona tuu vaa ai lea mo Savaii i Vaitoomuli Palauli mo ona toe sauniga. Sa ou ta'ita'i i le toe sauniga, o le afioga i le Tiakono ia Sopo o le Ekalesia Katoliko Roma na tatalo, a o le susuga faafeagaiga EFKS Vaitoomuli ia Fereti Sefo FS na saunia le lauga. Sa molimau le afioga i le Komesina o Leoleo ma Falepuipui e tusa ma le soifua galue o Vaovasa i le Matagaluega.

Sa saunoa molimau le faletua ia Faaeaifaleupolu e tusa ma le latou mafutaga ma le tamā. Sa molimau foi le sui o le aiga o Vaovasa i Vaitoomuli. Na ou molimau e tusa ma le soifua faaleagaga o Vaovasa. Sa autū la'u molimau i le upu a Ionatana na fai atu i lona tamā o Saulo, ina ia manatua e Saulo le ola fesoasoani o Tavita auā ia ma lana faigamalo (1 Samuelu 19, “*5Na ia tuu foi lona ola i lona lima...*”

Na faai'u ona toe sauniga i lona oliolisaga tumau i lona aiga i Vaitoomuli lava, sa faatino foi le tula'i fa'aaloalo a le Matagaluega Leoleo ma Falepuipui, e le afioga i le Minisita, o le afioga Komesina, ma Komesina Lagolago uma lava o le Matagaluega sa auai. O le susuga i le Taitaifono Komiti Aoga a le Ekalesia, Fereti Sefo FS sa taitaia lea sauniga faai'u.

Ona matou faatofa atu ai lea i le afioga i le tiakono ia Vaovasamanaia Lapi Filo, i le Pese 268, “Talofa uso e, tofaina oe., ua sau le itupo e malolo.. Tofa, tofa, tofa.”

Faafetai Vaovasamanaia i lou alofa. Ia i le Atua le viiga e faavavau, ona o lou soifua faatuatua faamaoni ia te Ia, i Lana Ekalesia ma Lana aufaigaluega.

***Saunia: Susuga Siolo Tauati FT,
EFKS Apia-uta
Matagaluega APIA.***

**TAUPA'Ū FAAOFONU
TIMUONEONE TAVITA TUSA
TUĀLAUTA**
2/11/1938 – 23/3/2022 (83+4+22)

Na soifua mai le susuga Taupa'ū Faaofonuu Timuoneone Tavita Tusa Tuālauta i le Aso Lulu, 2 Novema 1938, a e na faamuta ana feau ma galuega i le lalolagi nei, ina ua valaau lona Matai e mapu atu i Ona aao i le Aso Lulu, 23 Mati 2022, ma ua atoa ai le 83 tausaga, 4 masina ma aso e 22 o lona soifua. O se tasi o toe ulutaia o le Aulotu i Ketesemane. Ua sili atu i le 40 tausaga o lona tofi tiakono ma le faletua ia Tailoloto Tusa.

O se tasi o tamā sa taulamua i le faatuina o le Aulotu i Ketesemane. O se auauna e faamaoni i lona tofi tiakono. E toaga i sauniga lotu, o Tofiga a le Pulega ma le Matagaluega. Sa avea o ia, o se tamā sa fai ma siliaga o le Ekalesia i Ketesemane. O se tamā sa finau ma tauivi mo le manuia o aiga ma le Ekalesia, ma e faagaloga lona soifua tautua mo le galuega a le Atua, ona o se tamā e tusaafia ona uiga ma lona loto alofa.

O lona sauniga faale'āiga sa ou ta'ita'iina, o le A'oa'o Fesoasoani o Tuuvaamalefoe Misipati na saunia Tatalo, a o le A'oa'o Fesoasoani ia Iopu Taugatauli sa fofogaina Afiofa Paia a le Atua. Sa molimau lana fanau, o fanau a ana fanau, aiga, uso ma tuafafine aemaise foi o ana uō ma e latou te masani. Sa ou saunia le Upu faamafanafana. O lona toe sauniga sa ta'ita'i i le Toeaina susuga Aufaga Faafia FT ma na saunia le Lauga faamafanafana. Sa molimau Hana Tusa o le sui o le fanau, molimau le faletua ia Tailoloto Tusa i le latou mafutaga ma le tamā. Sa ou molimau i lona soifua faaleagaga.

Ona faai'u lea i lona oliolisaga tumau i Whenua Tapu, sa ou ta'ita'i, ma faamavae atu ai i le tamā i le Pese faamavae a le au kerisiano – 'Talofa uso e, tofaina oe...' 'Le auauna lelei e, ma le faamaoni, ulufale mai ia i le fiafia o lou Alii.' Ia manuia lau malaga Taupa'ū Tusa.

***Saunia: Susuga Kuatemanu Ulutui FS,
EFKS Ketesemane
Matagaluega LAUMUA O AOTEAROA.***

MERAPI LAITESE KORIA
(16/1/1932 – 6/6/2022 (90+4+22))

O Merapi Koria o le faletua o le tiakono. O lana galuega na galue ai, o se tamaitai foma'i (LVN Nurse) mo le 40 tausaga. O ia o se tasi o toe ulutaia o le Ekalesia EFKS Ola mo Keriso i San Diego, Amerika. Na fanau mai o ia i le falema'i i Motootua, Apia Samoa i le Aso Toona'i, Ianuari 16, 1932 a e na valaau i ai lona Matai i le Aso Gafua, Iuni 6, 2022. Ua 90 tausaga, 4 masina ma aso e 22 le matua o lona soifua. Na faaiipoipo atu ia Anesi Mabudawane Koria (ua maliu) ia Fepuari 19, 1959. O ona matua: o lona tamā o Mose Hanipale, a o lona tina o Fualaau Taituuga Manusamoa Hanipale. E toatolu ona tuagane: Rupi Hanipale FS, Lima Hanipale ma Rev. Feata Hanipale, ua maliliu uma i latou. E to'afā ona uso: Manusamoa H. Satoafaiga, Laisarini Hanipale Brady, Leota Senerita Hendrisken (ua maliu), ma Eseta Porotesano (ua maliu). O le la fanau ma le tamā ia Anesi e to'afā: Taituuga Samoa Koria, Anesi Nokise Jr. Koria, Rita Koria Eteuati (ua avea ma faletua o le faifeau, Susuga Alesana Eteuati FS), ma le tamaitai o Perelini Florence Koria. Na la tausaga foi le tamaitai o Sianiu Koria ma avea ma la ulumatua. O fanau a fanau e 18. O fanau tausi e toavalu.

O Merapi ma Anesi o se tasi o Matafale faavae o le Ekalesia EFKS Ola mo Keriso i San Diego, ina ua faavaeina le Ekalesia i le 1999. A e le'i faatuina le Ekalesia EFKS Ola mo Keriso, ua tele tausaga o galulue Merapi ma Anesi i le ulua'i Ekalesia Samoa na faavaeina i Amerika i lalo o le ta'ita'iga a le Toeaina ia Suitonu Galea'i.

O Merapi o se tina e fiafia e auauna. E iloa lea uiga lelei i le faatinoina o lona soifua foa'i i le galuega a le Atua. E talitonu i le foa'i ma le loto fiafia o faamanuiaga ua la maua ma le tamā ia Anesi i le galuega a le Ekalesia. Soo se lālā o le Ekalesia e fiafia e faamaopoo, aemaise le mafutaga a Tina e fiafia e faamalosi lea lālā o le Ekalesia auā o le manuia lea e taoto i le fai mea mafai o tina o le Ekalesia. O ona uiga faatina alofa e tautala sa'o, ma tuu sa'o lona finagalo, e lē faa-'alo'alo pe gūgū pe a i ai se mea e tatau ona faasagatonu. A momoli lana mau, e momoli i upu tuusa'o ma le gagana faigofie. E mana'o foi ia manino uma tala o tupe a le Ekalesia ma totonu

o le aiga. O se tina e toa lona loto. E toa upu toe toa le faatinoga o upu. O se tina e talitonu i le olaga tatalo, ma le ola mata'u i le Atua. O se tofa ma se faautautaga a se tina o loo atagia ai le silasila faale-Atua mo le manuia o le galuega.

O le sauniga faale'aiga na faia i le malumalu o le Ekalesia a le Malamalama o Samoa. Sa ta'ita'i lava le Susuga Alesana Eteuati FS ma nisi o faifeau o le aiga lea sauniga. O ona toe sauniga na ou ta'ita'iina ma saunia le molimau faaleagaga o lona soifua galue i le Ekalesia. O molimau a le aiga na saunia lea e le tina matua, le tofa Manusamoa Hanipale Satoafaiga ma le tofa ia Taulapapa Tanielu Koria. Na molimau foi le fanau – faletua ia Rita A. Eteuati, Sianiu Koria Savaiinaea, Taituuga Samoa, Anesi Jr Koria, ma le tamaitai o Perelini. Na saunia e le faifeau susuga Faafouina Solomona le Tatalo, o le Tusi Paia na faitauina e le susuga Tanu Tootoo AF. O le susuga i le faifeau ia Filo Tauaivale FS na saunia le Lauga. Ona faai'u lea i le fanuatanu i Greenwood mo ona toe sauniga, sa ou taitaiina, ma faatofa atu ai ia te ia i le ola nei, i le Pese faamavae a le Ekalesia – 'Talofa uso e, tofaina oe..'

A tulei atu lou sa i gatai ma e folau atu i tafa'ilagi, e manatua pea oe i lou alofa na faasoa mai ua manuia ai le Ekalesia EFKS Ola mo Keriso. Ua uma foi ona e tapena faafafine toaga mea uma auā lau fanau ma a latou fanau ma lou aiga. Faafetai foa'i, faafetai galue Tina Mama Merapi. Ia folau i le Lagi ma le manuia, tatou feiloa'i i se aso.

***Saunia: Susuga Makerusa Porotesano FT,
EFKS Ola mo Keriso, San Diego.
Matagaluega AMERIKA.***

TALIILAGI MATAMEA 17/2/1936 – 22/8/2022 (86+6+6)

O le tina ia Taliilagi Matamea sa soifua mai i le Aso Gafua, 17 Fepuari 1936, a e na maliu i le Aso Gafua 22 Aokuso 2022. Ua 86 tausaga, 6 masina ma aso e 6 lona soifua. O le aso 7 Setema 2022 na momoli mai ai lona tino maliu i le malumalu EFKS Eva mo ona toe sauniga. O le itula e 9.00 i le taeao na faia ai ona toe sauniga. O a'u (Irenio Feata Tagaloa FS) sa ta'ita'i, a o le susuga i le Faifeau Nofu Aiga ia Sealii Faigaa FS sa faaulufaleina le tino maliu o le

Tina i le falesā mo ona toe sauniga. O le A'oa'o Fesoasoani susuga Taivale Samu AF sa saunia talosaga, a o a'u sa saunia le Upu faamafanafana. Na mae'a le sauniga ona momoli atu lea o le tino maliu o le Tina i lona aiga lava i Eva mo lona sauniga i lona oliolisaga tumau ma lagomau ai. Ia manuia tele lau malaga Taliilagi, ia maua sou nofoaga i le malo e faavavau ua saunia e lo tatou Alii mo ona tagata faatuatua.

***Saunia: Susuga Irenio Feata Tagaloa FS,
EFKS Eva, Saoluafata
Matagaluega VAIMAUGA***

MEAATI LANU TUMALO SAMU 19/10/1939 – 10/9/2022 (82+10+23)

O le tina ia Meaati Taivale Lanu Tumalo Samu, o se Tiakono Tina o le EFKS Eva. Na soifua mai o ia i le Aso Tofi 10 Oketopa 1939, a e na maliu i le Aso Toonai 10 Setema 2022. O le aso 21 Setema 2022 i le itula 7.00 i le taeao na momoli mai ai lona tino i lona aiga ma sauni ai lava mo ona toe sauniga i le malumalu EFKS Eva i le 10 i le taeao i le aso lava lea.

O le susuga Kelekolio Sanele FS o le lupe faalele a le aiga sa faaulufaleina le tino maliu o le Tina Tiakono i totonu o le malumalu mo lona toe sauniga. O a'u sa ou ta'ita'i, o le susuga i le A'oa'o Fesoasoani ia Posea Seumanutafa AF sa faitauina le Tusi Paia, a o le Faifeau Nofu Aiga susuga Sealii Faigaa FS sa saunia talosaga.


O a'u na saunia le Upu faamafanafana mo le aiga, o uo ma e masani faapea le Ekalesia. O le manatu autu o lea aso, 'Anapogi Moni'. O se tasi lea auunaga sa nafa ma lenei tina matua, o le tatalo ma le anapogi. Faafetai Meaati mo le mafutaga, malo le fai tatalo, malo le galue mo le Atua ma Lona finagalo. Na mae'a le sauniga i le malumalu ona momoli atu lea o le tino maliu o le tina tiakono i lona aiga lava i Eva ma lagomau ai i lona oliolisaga tumau. Mapu atu ia Tina i aao o lo tatou Matai, o la lava na fetalai, "Le auuana lelei e, ma le faamaoni, ulufale mai ia i le fiafia o lou Alii."

***Saunia: Irenio Feata Tagaloa FS,
EFKS Eva,
Matagaluega VAIMAUGA.***

MERAPI LAITSE KORIA



TAUPA'Ū F.T.T.TUĀLAUTA



IRISE- SUN

VAOVASAMANAIA LAPI FILO



Dr. Paulo Koria FS & Uputuu, ua penisione, Peter Lokeni FS & Tauvela, ua sui atu, o faafeagaiga a le EFKS Faatoia.